

Prof. dr. sc. Asim Bilajbegović, dipl. inž. geod.



U večernjim satima 15. decembra 2020. godine od posljedica COVID-19 na „bolji svijet“ preselio je još jedan dobar čovjek, znanstvenik i edukator, Profesor dr. Asim Bilajbegović, dipl.ing. geodezije. Otišao je u svojoj 71. godini života, ostavivši u nevjerici i šoku znanstvenike, profesionalce i bivše studente geodezije širom njegove Bosne i Hercegovine, ali i svih drugih država Zapadnog Balkana, Njemačke, Austrije. Velik je to gubitak, teško nadoknadiv za regionalnu geodetsku zajednicu.

Profesor Asim Bilajbegović je rođen je u Sanskom Mostu, školovanje započeo u rodnom gradu, u Sarajevu je završio Geodetsku tehničku školu, studij geodezije završio na Geodetskom fakultetu Sveučilišta u Zagrebu, a doktorirao na Univerzitetu u Bonnu 1978. godine. Po završetku disertacije se vratio u Zagreb, gdje je radio sve do 1994. godine, napredujući od zvanja docenta do redovnog profesora. Bio je dekan u periodu 1985 -1987. Od 1994. do umirovljenja 2015. radio je kao profesor geodezije na Tehničkom Univerzitetu u Dresdenu. Tokom 20-tak posljednjih godina svog života je predano sudjelovao u nastavi sva tri studijska programa kao i u istraživačkim projektima na Odsjeku za geodeziju i geoinformatiku Građevinskog fakulteta Univerziteta u Sarajevu. Zahvalni smo za ogroman doprinos bosanskohercegovačkoj geodeziji i očuvanje kontinuiteta visokog obrazovanja iz oblasti geodezije na Građevinskom fakultetu Univerziteta u Sarajevu.

Profesor dr. Asim Bilajbegović ostat će u sjećanju generacijama studenata kao osoba od integriteta, osoba koja živi akademske principe, sa aktivnim stavom da se svoja država gradi znanjem i odgovornošću. Neizostavni blagi smješak na njegovom licu tokom predavanja govorio je slušateljima da dijeliti znanje drugima je istinsko zadovoljstvo i sreća. Svi studenti i kolege svjedoče da nije štedio energiju za svako svoje predavanje, radovao se pitanjima, a svakom je slušatelju želio približiti geodetsku teoriju i praksu na matematički jednostavan način. Jedna od njegovih izreka po kojoj ćemo ga se sjećati je: „Dobar teoretičar je najbolji praktičar.“

Neka duša mog Profesora i mentora nađe vječni mir u nekom drugom, ljepšem dijelu Univerzuma!

Za kraj se čini prikladnim citirati dijelove reakcija i izraze žaljenja nekih od uvažanih Profesora geodezije (privatna korespondencija) i njegovih bivših studenata (Facebook):

Prof. Dr.Dr.h.c. **Harald Schuh**, Predsjednik Međunarodne asocijacije za geodeziju – IAG; Direktor Odjela 1 „Geodezija“ GFZ Helmholtz Centar Potsdam, Njemački istraživački centar za Geo-znanosti; Profesor za Satelitsku geodeziju na TU Berlin:

...*“Bio je tako fina osoba, izvrstan profesor i znanstvenik u geodetskoj teoriji. Mnogo sam ga cijenio.”*

Prof. Dr. Dušan Kogoj, dipl.ing. geod. Univerzitet u Ljubljani:

...*“bio je nevjerovatan čovjek, velik, najveći u srcu“*...

Prof. dr. Krešimir Frankić, dipl.ing.geod., Institut Tehnologije British Columbia, Kanada:

...*“Otišao mi je prijatelj, a svijet geodezije izgubio je prvorazrednog znanstvenika, a mi, njegovi prijatelji toplo ljudsko biće. Dragi moj Asime malo je takvih kao što si ti bio.”*

Prof. Dr. Zlatko Srbinovski, dipl.ing.geod, Univerzitet Kirilo i Metodije Skoplje:

..*Jako me je rastužila vijest o smrti dragog prof. Bilajbegovića. Time je ne samo bosanska geodezija, već i cijela, mnogo šira geodetska zajednica izgubila veoma uglednog člana i prije svega velikog profesora i prijatelja.*

Bivši studenti i kolege i saradnici napisali su:

Mahir Esad, dipl.ing.geod.

...*“Veliki čovjek, imali smo čast biti mu savremenici“*...

Alma Žunić, dipl.ing.geod.

...*Velik gubitak. Divan čovjek. Divan profesor. Veliki znalac i naučnik. Ogroman gubitak za geodeziju na globalnom nivou.*

Edin Ždralović, dipl.ing.geod.

...*“Veliki čovjek i veliki stručnjak.”*

Eldin Sadiković, dipl.ing.geod.

...*“Bio je profesor koji razmišlja izvan okvira, matematički genije, uvijek ispred vremena u kojem je živio, a sa ljudske strane mogu reći da sam upoznao vrlo malo takvih ljudi.”*

Advija Ušanović, tehnički sekretar Građevinskog fakulteta Univerziteta u Sarajevu:

...*“Zaista draga osoba, gospodin, a kao prvo, čovjek. Premotavam film u glavi, sjećanja o njemu, susreti, ponašanje, ..., sve, jedna apsolutno pozitivna osoba.”*

Vanesa Alispahić, ing. geod.

...*“ velikom gospodinu, divnom pedagoški, intelektualno, stručnom profesoru, čast je bila slušati predavanja njegova.”*

Ismar Medinić, dipl.ing.geod.

...*“bio je genijalac u svojoj struci i divan čovjek prije svega“*...

Nerma Muminović, dipl.ing.geod.

...*“Da svi imamo samo pola njegovog znanja i sposobnosti, gdje bi nam bio kraj...On je jedan veliki čovjek! Ponosna sam što sam ga poznavala.”*

Medžida Mulić